

26.okt. 2016

UKA2016/143-57

Inatsisartut aaliangiiffigisassaattut siunnersuut Naalackersuisut peqquneqassasut Naammassisaqarsinnaassuseqarnermik (produktivitet) ataatsimiisitaliarsuarmik pilersitsissasut.

(Inatsisartunut ilaasortaq Per Rosing-Petersen, Attaviitsoq)

Naalackersuisut namminersortunngorsaannermut isumalioqatigiissitamik pilersitsinissaannut, pisortat suliffeqarfiit tamakkiisumik tamakkiisumiinngitsumillu pigisaannik misissueqqissaartussanik siunnersuuteqartussanillu suliffeqarfiit sorliit namminersortunngorsarnerinit iluanaaruteqartoqarsinnaaneramik suliaqartussanik aalajangiiffigisassatut siunnersuut. Misissuineq UKA 2017-mi Inatsisartunut tunniunneqassaaq.

(Inatsisartunut ilaasortaq Poul Hansen, Demokraatit)

Siullermik siunnersuuteqartunut qujanaq.

Siumumiit nunatsinni aningaasarsiornikkut pitsaasumik ingerlatsisoqassasoq pingaartitaraarput minnerunngitsumik nunatsinni qanoq aqqissugaanerput ilisimaaralugu suliffeqartitsinerit annertuumik politikikkut siunnerfinnut naapertuuttut atortinneqarnissaat pingaaruteqarmata.

Nunatsinni Namminersortunngorsaanerit ataasianngeqalutik oqallisigineqartarput soorluttaa aningaasat pisussutaasinnaanerisa qaffasinnerpaamik inissimatinneqarnissat ujartortuarneqartoq.

Ataatsimut isigalugit Namminersorlutik Oqartussat suliffeqarfiutaat piginneqataaffiilu, politikikkut sunniuteqarnerit aqutigalugit, tassaapput inuiaqatigiit aningaasarsiorninerinut pingaaruteqartut, amerlasuutigut sumiiffiit siammassissumiittut suliffeqarnikkut, nioqutissiornikkut, angallassinikkut, ilinniartitaanikkut il.il. naammaginartumik kiffartuunneqarsinnaanerinut qularnaarisuusartut.

Eqqumaariffigineqartariaqartut ilagaat suliffeqarfiit qanoq aqunneqarnissaanut akuliuttarneq niuerneq aqutigalugu ingerlatsisunut mianernartoqartuarmat taamaattorli pingaaruteqarpoq piginnittut sinnerlugit Naalackersuisut Namm.Oqartussat pigisaannut piginneqataaffigisaannullu erseqqissumik anguniagaqartuarnissaat iliuusissanillu pilersaarusiornerit erseqqissut aqutigalugit malittarisassiornikkut ingerlatsisoqarnissaat.

Nunatsinni niueqatigiinneerup akilersinnaanerusumik ingerlanneqarnissaanik ujartuineq ingerlaavartumik nalilersorneqartuartaavoq, taamaattorli nunanut allanut sanilliulluta aningaasat kaaviaartitat qivaraanni annikittunnguupput taamaattumik nunarsuarmioqataasutut nunatsinni suliffeqarfiit nunarsuarmi suliffeqarfinnut innuttarpassualinnut aningaasaatilissuarnullu



unammillerniartussaapput. Taamatut unammillersinnaassuseqarniarnermi pingaaruteqarpoq sinaakkusiussat suliffeqarfiup anguniagaannut naapertuuttut atortinneqarnissaat.

Taamaattumik akisussaassuseqartumik nunatsinni aningaasat pigineqartut amerlisarnissaat iliuuseqarfigissallugu pingaaruteqarpoq, tassa nunatsinni periarfissat amerlisarneqassappata pingaaruteqarmat aallaqqaataanniit misileraanissamut akissaqarnissaq/periarfissaqarnissaq, soorlutaaq iluatsinngitsumik angusaqarsinnaanissaq sapiissuseqarfigineqartariaqassalluni nutaaliornertit annaasaqaataasinnaasumik nassaqarfiusarmata taamaaliornikkut aatsaat inuiaqatigiit atugaat ajorseriarnernik kinguneqartitsiviunngitsumik suliffeqarfiit misileraallutik annerusumik nunatsinni nutaaliornissamut ingerlatsilernissaq periarfissaqarfigilissammassuk.

Siumumiit qularutiginnilarput niuernikkut allangortitsisoqassappat inuiaqatigiit niueriaasiat sungiusimasallu allangortinneqartariaqartut, taamaaliornissamullu politikikkut sinaakkusiussat tassunga nukittorsaasussat pigineqartariaqarlutik. Taamaaliornissamut alloriarfissamut toqqammavissat allaqartut pigineqarput, tamanna ilaatigut Napatitsinermut Siuariartornissamullu Pilersaarusiame nassuiaatigineqarput siunnerfiullutik soorlutaaq aningaasaqarnermut Siunnersuisoqatigiit saqqummiussaqartarnerisigut amerlasuutigut qanoq ittoqarneranik oqariartuutit saqqummiunneqartartut. Taamaasilluni nukittorsarniakkat nukittorsartariaqakkallu toqqammaviusariaqartut pigineqareerlutik.

Siumumiit nunarsuarmiut nunatsinni aningaasaleerusuttut taamaatullu siuariaataasinnaasunik niuerusuttut eqaaneruseqarfigissallugu sulleqatiginissaat pisariaqartoq naqissuserusupparput, taamaaliornikkut annertusaannerit ingerlanneqarsinnalissammata, siunnersuutigineqartuniillu aningaasartuutigineqartussat 4 mio. + 2,4 mio. katillugit 6,4 mio. killiffimmi pisariaqartitsisunut atorunneqarlugit matumuuna nalunaarutigissavarput.

Taamatut Siumumiit oqaaseqarluta ataatsimut isigalugit Ataatsimiititaliami sukumiisumik nalilersoqqullugit Inuussutissarsiornermut Ataatsimiititaliamut innersuussutigaaavut.